

lorum, quia terrenus est, perdes de terra. « Et semen eorum a filiis hominum<sup>1</sup>. » Et opera illorum, vel quoscumque seduxerunt, non deputabis inter filios hominum, quos in haereditatem sempiternam vocasti.

XII. « Quoniam declinaverunt in te mala. » Hæc autem poena retribuetur eis, quoniam mala quæ sibi imminere, te regnante, arbitrabantur, in te occidendum detorserunt. « Cogitaverunt consilium, quod non potuerunt stabilire<sup>2</sup>. » Cogitaverunt consilium, dicentes : « Expedit unum pro omnibus mori<sup>3</sup> : » quod non potuerunt stabilire, ne-scientes quid dixerint.

XIII. « Quoniam pones eos deorsum. » Quoniam ordinabis eos in his, a quibus postpositis et contemptis avertaris. « In reliquiis tuis præparabis vultum eorum<sup>4</sup>. » Et in his quæ relinquis, id est, in cupiditatibus regni terreni, præparabis tibi ad passionem impudentiam eorum.

XIV. « Exaltare, Domine, in virtute tua<sup>5</sup>. » Quem humilem non cognoverunt, exaltare, Domine, in virtute tua, quam infirmitatem putaverunt. « Cantabimus et psallemus virtutes tuas<sup>6</sup>. » Corde et opere celebrabimus et nota faciemus mirabilia tua.

<sup>1</sup> Psal. xx, 11. — <sup>2</sup> Ibid. 12. — <sup>3</sup> Joan. xi, 50. — <sup>4</sup> Psal. xx, 13. — <sup>5</sup> Ibid. 14. — <sup>6</sup> Ibid.

## ENARRATIO I

## IN PSALMUM XXI (10).

In finem, pro susceptione matutina, Psalmus David<sup>1</sup>.

I. In finem pro resurrectione sua ipse Dominus Jesus Christus loquitur. Matutina enim fuit prima sabbati resurrectio ejus<sup>2</sup>, qua susceptus est in æternam vitam, « Qui mors ultra non dominabitur<sup>3</sup>. » Dicuntur autem ista ex persona Crucifixi; nam de capite Psalmi hujus sunt verba, quæ ipse clamavit, cum in cruce penderet, personam etiam servans veteris hominis, cuius mortalitatem portavit. Nam vetus homo noster confixus est cruci cum illo<sup>4</sup>.

II. « Deus, Deus meus, respice me, quare me dereliquisti longe a salute mea<sup>5</sup>? » Longe factus a salute mea: quoniam longe est a peccatoribus salus<sup>6</sup>. « Verba delictorum meorum. » Nam hæc verba sunt non justitiae, sed delictorum meorum. Vetus enim homo confixus cruci loquitur; etiam causam ignorans quare eum dereliquerit Deus: aut certe: « Longe a salute mea sunt verba delictorum meorum. »

III. « Deus meus, clamabo ad te per diem, nec exaudiens dies<sup>7</sup>. » Deus meus, clamabo ad te in rebus prosperis hujus vitæ, ut non mutentur; nec exaudies quia verbis delictorum meorum ad te clamabo. « Et nocte, et non ad insipientiam mihi. » Et in adversis utique hujus vitæ clamabo ut prosperentur, et similiter non exaudies. Neque

<sup>1</sup> Psal. xxi, 1. — <sup>2</sup> Matth. xxviii, 1. — <sup>3</sup> Rom. vi, 9. — <sup>4</sup> Ibid. 6. —

<sup>5</sup> Psal. xxi, 2. — <sup>6</sup> Id. cxviii, 155. — <sup>7</sup> Id. xxi, 3.

hoc facis ad insipientiam mihi, sed potius ut sapiam quid clamare me velis : non verbis delictorum ex desiderio temporalis vitæ, sed verbis conversionis ad te in vitam æternam.

IV. « Tu autem in sancto habitas, laus Israël<sup>1</sup>. » Tu autem in sancto habitas, et ideo immunda delictorum verba non exaudies. Laus videntis te, non ejus qui laudem suam quæsivit in gustando vetito cibo, ut apertis corporeis oculis abscondere se conaretur a conspectu tuo<sup>2</sup>.

V. « In te speraverunt patres nostri<sup>3</sup>. » Omnes justi scilicet, non quærentes suam laudem, sed tuam. « Spe-» raverunt, et eruisti eos. »

VI. « Ad te clamaverunt, et salvi facti sunt<sup>4</sup>. » Ad te clamaverunt, non verbis delictorum, a quibus longe est salus, et ideo salvi facti sunt. « In te speraverunt, et non » sunt confusi. » In te speraverunt, nec eos fecerunt spes. Non enim in se illam posuerunt.

VII. « Ego autem sum vermis, et non homo<sup>5</sup>. » Ego autem jam non ex persona Adam loquens, sed ego proprius Jesus Christus, sine semine in carne natus sum, ut essem in homine ultra homines : ut vel sic dignaretur imitari humana superbia humilitatem meam. « Opprobrium ho-» minum et abjectio plebis. » In qua factus sum oppro-rium hominum : ita ut pro convicio maledicto dicere-tur : « Tu sis discipulus ejus<sup>6</sup> : » et plebs me contemneret.

VIII. « Omnes qui conspiciebant me, subsannabant me<sup>7</sup>. » Omnes qui conspiciebant me, irridebant me. « Et locuti » sunt labiis, et moverunt caput. » Et locuti sunt non in corde, sed in labiis.

IX. Nam irridenter moverunt caput, dicentes : « Spe-» ravit in Dominum, eruat eum : salvum faciat eum,

<sup>1</sup> Psal. xx, 14. — <sup>2</sup> Gen. iii. — <sup>3</sup> Psal. xxi, 5. — <sup>4</sup> Ibid. 6. — <sup>5</sup> Ibid. 7.

— <sup>6</sup> Joan. ix, 28. — <sup>7</sup> Psal. xxi, 8.

» quoniam vult eum<sup>1</sup>. » Hæc verba erant, sed in labiis dicebantur.

X. « Quoniam tu es qui extraxisti me de ventre<sup>2</sup>. » Quoniam tu es qui extraxisti me, non solum de illo ventre virginali, (nam omnibus hominibus lex ista nascendi est, ut de ventre extrahantur,) sed etiam de ventre iudaicæ gentis, cuius tenebris obtegitur, et nondum in lucem Christi natus est, quisquis in carnali observatione sabbati et circumcisione cæterorumque talium salutem ponit. « Spes » mea ab uberibus matris meæ. » Spes mea Deus, non ex quo uberibus Virginis lactari coepi ; nam et ante utique : sed ab uberibus Synagogæ, sicut de ventre dixi, extraxisti me, ne carnalem consuetudinem sugerem.

XI. « In te confirmatus sum ex utero<sup>3</sup>. » Ipse est uterus Synagogæ, qui me non pertulit, sed jactavit me : non autem cecidi, quia continuisti me. « De ventre matris meæ » Deus meus es tu. De ventre matris meæ : » Non efficit venter matris meæ ut tanquam parvulus oblitus essem tui.

XII. « Deus meus es tu, ne discedas a me : quoniam » tribulatio proxima est<sup>4</sup>. » Deus meus ergo es tu, ne discedas a me, quoniam tribulatio juxta me est ; nam est in corpore meo. « Quoniam non est qui adjuvet. » Quis enim adjuvat, si tu non adjuvas ?

XIII. « Circumdederunt me vituli multi<sup>5</sup>. » Circumdedit me multitudo luxuriantis plebis. « Tauri pingues obsede-» runt me. » Et principes ejus de oppressione mea læti, obsederunt me.

XIV. « Aperuerunt in me os suum<sup>6</sup>. » Aperuerunt in me os, non de Scripturis tuis, sed de cupiditatibus suis. « Sicut leo rapiens et rugiens. » Sicut leo cuius rapina

<sup>1</sup> Psal. xxi, 9. — <sup>2</sup> Ibid. 10. — <sup>3</sup> Ibid. 11. — <sup>4</sup> Ibid. 12. — <sup>5</sup> Ibid. 13. — <sup>6</sup> Ibid. 14.

est, quod apprehensus adductus sum; et rugitus: « Crucifige, crucifige<sup>1</sup>. »

XV. « Sicut aqua effusus sum, et dispersa sunt omnia ossa mea<sup>2</sup>. » Sicut aqua effusus sum, ubi lapsi sunt persecutores mei: et timore dispersa sunt a me firmamenta corporis, hoc est, Ecclesiæ, Discipuli mei. « Factum est cor meum sicut cera liquefascens, in medio ventris mei<sup>3</sup>. » Sapientia mea, quæ in sanctis libris de me conscripta est, tanquam dura et clausa non intelligebatur: sed postquam ignis meæ passionis accessit, tanquam liquefacta, manifestata est, et excepta est in memoria Ecclesiæ meæ.

XVI. « Exaruit velut testa virtus mea<sup>4</sup>. » Exaruit passione virtus mea: non velut fœnum, sed velut testa, quæ fit igne firmior. « Et lingua mea adhæsit fauicibus meis. » Et servaverunt apud se præcepta mea illi, per quos locuturus eram. « Et in pulverem mortis deduxisti me. » Et in impios morti destinatos, quos tanquam pulverem projicit ventus a facie terræ, deduxisti me.

XVII. « Quoniam circumdederunt me canes multi. » Quoniam circumdederunt me, non pro veritate, sed pro consuetudine, latrantes multi. « Concilium malignantium circumdedit me. Foderunt manus meas et pedes<sup>5</sup>. » Foderunt clavis manus meas, et pedes.

XVIII. « Dinumeraverunt omnia ossa mea<sup>6</sup>. » Dinumeraverunt in ligno crucis extenta omnia ossa mea. « Ipsi vero consideraverunt et conspexerunt me. » Ipsi vero, id est, non mutati, consideraverunt et conspexerunt me.

XIX. « Diviserunt sibi vestimenta mea, et super vestem meam miserunt sortem<sup>7</sup>. »

XX. « Tu autem, Domine, ne longe feceris auxilium tuum a me<sup>8</sup>. » Tu autem, Domine, non in fine sæculi,

<sup>1</sup> Joan. xix, 6. — <sup>2</sup> Psal. xxi, 15. — <sup>3</sup> Ibid. — <sup>4</sup> Ibid. 16. — <sup>5</sup> Ibid. 17.  
— <sup>6</sup> Ibid. 18. — <sup>7</sup> Ibid. 19. — <sup>8</sup> Ibid. 20.

sicut cæteros, sed statim resuscita me. « In defensionem meam aspice. » Aspice, ne quid mihi noceant.

XXI. « Erue a framea animam meam<sup>1</sup>. » Erue animam meam a lingua dissensionis. « Et de manu canis unicum meam. » Et de potestate populi ex consuetudine latrantis Ecclesiam meam.

XXII. « Salvum me fac de ore leonis. » Salvum me fac de ore regni sacerularis. « Et a cornibus unicorniorum humilitatem meum<sup>2</sup>. » Et a sublimitatibus superborum se singulariter erigentium consortesque non ferentium, salvam fac humilitatem meam.

XXIII. « Narrabo nomen tuum fratribus meis<sup>3</sup>. » Narrabo nomen tuum humilibus, et se invicem diligentibus, sicut a me dilecti sunt, fratribus meis. « In medio Ecclesiæ cantabo te. » In medio Ecclesiæ gaudens prædicabo te.

XXIV. « Qui timetis Dominum, laudate eum<sup>4</sup>. » Qui timetis Dominum, nolite querere laudem vestram, sed ipsum laudate. « Universum semen Jacob, magnificate eum. » Universum semen ejus cui major serviet, magnificate eum.

XXV. « Timeat eum omne semen Israël. » Timeant eum omnes ad novam vitam nati, et ad visionem Dei reparati. « Quoniam non sprevit neque despexit precem pauperis<sup>5</sup>. » Quoniam non sprevit precem, non illius qui verbis delictorum clamans ad Deum vitam vanam transire solebat, sed precem pauperis non tumentis in pompis transeuntibus. « Neque avertit faciem suam a me. » Sicut ab illo qui dicebat: « Clamabo ad te, nec exaudies, Et cum clamarem ad eum, exaudivit me. »

XXVI. « Apud te laus mea<sup>6</sup>. » Non enim laudem meam quæro, quia tu mihi es laus, qui in sancto habitas: et jam sanctum te deprecantem exaudis laus Israël. « In

<sup>1</sup> Psal. xxi, 21. — <sup>2</sup> Ibid. 22. — <sup>3</sup> Ibid. 23. — <sup>4</sup> Ibid. 24. — <sup>5</sup> Ibid. 25.  
— <sup>6</sup> Ibid. 26.

» Ecclesia magna confitebor tibi. » In Ecclesia orbis terrarum confitebor tibi. « Vota mea reddam coram timen-  
» tibus eum. » Sacra menta corporis et sanguinis mei red-  
dam coram timentibus eum.

**XXVII.** « Edent pauperes , et saturabuntur<sup>1</sup>. » Edent humiles et contemptores sæculi , et imitabuntur. Ita enim nec copiam hujus sæculi concupiscent , nec timebunt inopiam. « Et laudabunt Dominum qui requirunt eum. » Nam laus Domini est eructatio saturitatis illius. « Vivent corda  
» eorum in sæculum sæculi. » Nam cibus ille cordis est.

**XXVIII.** « Commemorabuntur , et convertentur ad  
» Dominum universi fines terræ<sup>2</sup>. » Commemorabuntur ; exciderat enim Deus gentibus mortaliter natis et in exte-  
riora tendentibus ; et tunc convertentur ad Dominum uni-  
versi fines terræ. « Et adorabunt in conspectu ejus uni-  
» versæ patriæ gentium. » Et adorabunt in conscientiis suis universæ patriæ gentium.

**XXIX.** « Quoniam Domini est regnum , et ipse domi-  
» nabitur gentium<sup>3</sup>. » Quoniam Domini est regnum , non superborum hominum : et ipse dominabitur gentium.

**XXX.** « Manducaverunt et adoraverunt omnes divites  
» terræ<sup>4</sup>. » Manducaverunt corpus humilitatis Domini sui etiam divites terræ , nec sicut pauperes saturati sunt usque ad imitationem , sed tamen adoraverunt. « In conspectu  
» ejus procident universi qui descendunt in terram<sup>5</sup>. » Solus enim videt quomodo procident universi , qui coelestem conversationem deserentes , in terra eligunt beati apparere hominibus , non videntibus ruinam eorum.

**XXXI.** « Et anima mea ipsi vivet<sup>6</sup>. » Et anima mea quæ in contemptu sæculi hujus quasi mori videtur hominibus , non sibi , sed ipsi vivet. « Et semen meum serviet

<sup>1</sup> Psal. xxi , 27. — <sup>2</sup> Ibid. 28. — <sup>3</sup> Ibid. 29. — <sup>4</sup> Ibid. 30. — <sup>5</sup> Ibid. —  
<sup>6</sup> Ibid. 31.

» illi. » Et opera mea , vel per me credentes in eum , ser-  
vient illi.

**XXXII.** « Annuntiabitur Domino generatio ventura<sup>1</sup>. » Annuntiabitur in honorem Domini generatio Novi Testa-  
menti. « Et annuntiabunt cœli justitiam ejus. » Et annun-  
tiabunt Evangelistæ justitiam ejus. « Populo qui nascetur  
» quem fecit Dominus<sup>2</sup>. » Populo qui nascetur ex fide  
Dominio.

## ENARRATIO II

### IN EUMDEM PSALMUM XXI<sup>3</sup>.

**I.** **Quod** taceri Deus noluit per Scripturas suas<sup>4</sup> , nec a nobis tacendum est , et a vobis audiendum. Passio Domini , sicut scimus , semel facta est : semel enim Christus mor-  
tuus est , justus pro injustis<sup>5</sup>. Et scimus , et certum ha-  
bemus , et fide immobili retinemus , « Quia Christus resur-  
» gens a mortuis , jam non moritur , et mors ei ultra non  
» dominabitur<sup>6</sup>. » Verba ista Apostoli sunt : tamen ne  
obliviscamur quod factum est semel , in memoria nostra  
omni anno fit. Quoties Pascha celebratur , numquid toties  
Christus moritur? Sed tamen anniversaria recordatio quasi  
repräsentat quod olim factum est , et sic nos facit moveri  
tanquam videamus in cruce pendentem Dominum ; non  
tamen irridentes , sed credentes. Pendens enim in ligno  
irrisus est , sedens in cœlo adoratur. An forte adhuc irri-  
detur , et jam non est irascendum Judæis , qui vel mo rien-

<sup>1</sup> Psal. xxi , 32. — <sup>2</sup> Ibid. — <sup>3</sup> Concio habita in solemnitate P'assionis  
Domini. — <sup>4</sup> Vide D. Guillon , tom. xxi , pag. 408-410. — <sup>5</sup> 1 Petr. iin , 18.

— <sup>6</sup> Rom. vi , 9.

tem deriserint, non regnante? Et quis est qui Christum adhuc irrideat? Utinam unus esset, utinam duo, utinam numerari possent. Tota palea areæ ipsius irridet eum, et gemit triticum irrideri Dominum. Hoc volo gemere vobis-  
cum. Tempus est enim lugendi. Passio Domini celebratur: tempus gémendi est, tempus flendi, tempus confitendi et deprecandi. Et quis nostrum est idoneus ad effundendas lacrymas pro dignitate doloris tanti: sed quid modo ait Propheta? « Quis dabit capiti meo aquam, et oculis meis » fontem lacrymarum<sup>1</sup>? » Si vere fons lacrymarum esset in oculis nostris, nec ipse sufficeret. Irrideri Christum in re aperta, in ea re ubi nemo potest dicere: Non intellexi: Possidenti enim universum orbem terrarum, pars offertur, et dicitur sedenti ad dexteram Patris: Ecce quid hic habes? et pro tota terra ostenditur illi sola Africa.

II. Verba quæ modo audivimus, fratres, ubi ponimus? Si possent de lacrymis describi! Quæ fuit mulier quæ intravit cum unguento<sup>2</sup>? Cujus typum portabat? nonne Ecclesiæ? Cujus figura erat illud unguentum? nonne odoris boni, de quo dicit Apostolus: « Christi bonus odor » sumus in omni loco<sup>3</sup>? » Ipsi enim Ecclesiæ insinuabat personam et Apostolus. Et quod dixit, Sumus, fidelibus dixit. Et quid dixit? Christi bonus odor sumus in omni loco. In omni loco dixit Paulus Christi bonum odorem esse omnes fideles, et contradicitur; et dicitur, « Africa sola bene olet, totus mundus putet. » Christi bonus odor sumus in omni loco, quis dicit? Ecclesia. Hunc bonum odorem significabat illud vas unguenti, quo perfusus est Dominus. Videamus si non coattestatur ipse Dominus. Dum quidam sua quærentes, avari, fures, id est, Judas ille diceret de illo unguento: « Ut quid ista perditio? po-» terat res pretiosa venumdari, et proficere pauperibus<sup>4</sup>. »

<sup>1</sup> Jerem. ix, 1. — <sup>2</sup> Matth. xxvi, 7. — <sup>3</sup> 2 Cor. ii, 14, 15. — <sup>4</sup> Matth. xxvi, 8.

Odorem enim bonum Christi vendere volebat. Quid respon-  
dit Dominus? « Ut quid molesti estis mulieri? Bonum » opus operata est in me<sup>1</sup>. » Et quid amplius dicam, quando ipse dixit: « Ubi cumque autem prædicabitur hoc Evan-» gelium in toto mundo, dicetur et quod fecit mulier » ista<sup>2</sup>? » Est quod addere? est quod detrahere? est quare aurem calumniatoribus accommodare? Aut men-  
titus est Dominus, aut fefellit illum? Eligant qui dicant, aut mentitam dicant veritatem, aut deceptam dicant ve-  
ritatem. « Ubi cumque prædicabitur hoc Evangelium. » Et quasi quæreres ab eo: Ubi enim prædicabitur? « In » toto mundo, inquit. » Psalmum audiamus, videamus si hoc dicit. Audiamus quod plangendo cantatur, et vere digna res planetu quando cantatur surdis. Miror, fratres, si hodie Psalmus iste legitur et in parte Donati. Rogo vos, fratres mei, confiteor vobis, novit Christi misericordia, quia sic miror quasi lapidei ibi sint, et non audiant. Quid apertius surdis dicitur? Passio Christi tam evidenter quasi Evangelium recitat, et dictum est ante nescio quot annos quam Dominus de Maria virgine nasceretur, præco erat nuntians judicem futurum. Legamus illum quantum angustia temporis patitur, non pro affectu doloris nostri, sed, ut dixi, quantum angustia temporis patitur.

III. « Deus, Deus meus, respice me: quare me dereli-» quisti<sup>3</sup>? » Iustum versum primum in cruce audivimus, ubi Dominus dixit, « Eli, Eli; » quod est, « Deus meus, » Deus meus: Lama sabachthani? » quod est, « Quare me » dereliquisti<sup>4</sup>? » Interpretatus est illud Evangelista, et dixit eum hebraïce dixisse: « Deus meus, Deus meus, » quare me dereliquisti? » Quid voluit dicere Dominus? Non enim dereliquerat illum Deus, cum ipse esset Dens, utique Filius Dei Deus, utique Verbum Dei Deus. Audi a

<sup>1</sup> Ibid. 10. — <sup>2</sup> Ibid. 13. — <sup>3</sup> Psal. xi, 2. — <sup>4</sup> Matth. xxvii, 46.

capite illum Evangelistam, qui ructabat quod biberat de pectore Domini<sup>1</sup>, videamus si Deus est Christus. « In principio erat Verbum, et Verbum erat apud Deum, et Deus erat Verbum<sup>2</sup>. » Ipsum ergo Verbum quod Deus erat : « Caro factum est, et habitavit in nobis. » Et cum Verbum Deus factum esset caro, pendebat in cruce, et dicebat? « Deus meus, Deus meus, respice me : quare me dereliquisti? » Quare dicitur, nisi quia nos ibi eramus, nisi quia corpus Christi Ecclesia<sup>3</sup>? Ut quid dixit : « Deus meus, Deus meus, respice me ; quare me dereliquisti, » nisi quodam modo intentos nos faciens et dicens : Psalmus iste de me scriptus est? « Longe a salute mea, verba delictorum meorum. » Quorum delictorum, de quo dictum est : « Qui peccatum non fecit, nec inventus est dolus in ore ejus<sup>4</sup>? » Quomodo ergo dicit « Delictorum meorum : » nisi quia pro delictis nostris ipse precatur, et delicta nostra sua delicta fecit, ut justitiam suam nostram justitiam ficeret?

IV. « Deus meus, clamabo ad te per diem, et non exaudies; et nocte, et non ad insipientiam mihi<sup>5</sup>. » Dixit utique de me, de te, de illo. Corpus enim suum gerebat, id est, Ecclesiam. Nisi forte putatis, fratres, quia, quando dixit Dominus : « Pater, si fieri potest, transseat a me calix iste<sup>6</sup>, » mori timebat. Non est fortior miles, quam imperator. « Sufficit servo ut sit sicut dominus ejus<sup>7</sup>. » Paulus dicit, miles regis Christi : « Compellor e duobus concupiscentiam habens dissolvi, et esse cum Christo<sup>8</sup>. » Ille optat mortem, ut sit cum Christo, et ipse Christus timet mortem? Sed quid nisi infirmitatem nostram portabat, et pro his qui adhuc timent mortem in corpore suo constitutis, ista dicebat? Inde erat illa vox, membrorum ipsius vox erat, non capitum, sic et

<sup>1</sup> Joan. xiii, 23. — <sup>2</sup> Id. i, 1. — <sup>3</sup> Ephes. i, 23. — <sup>4</sup> 1 Petr. ii, 22. — <sup>5</sup> Psal. xxi, 4. — <sup>6</sup> Matth. xxvi, 39. — <sup>7</sup> Id. x, 25. — <sup>8</sup> Philip. i, 23.

hic: « Per diem et noctem clamavi, et non exaudies. » Multi enim clamant in tribulatione, et non exaudiuntur: sed ad salutem, non ad insipientiam. Clamavit Paulus ut auferretur ab eo stimulus carnis; et non est exauditus, ut auferretur; et dictum est ei : « Sufficit tibi gratia mea, nam virtus in infirmitate perficitur<sup>1</sup>. » Ergo non est exauditus, sed non ad insipientiam, sed ad sapientiam: ut intelligat homo medicum esse Deum, et tribulationem medicamentum esse ad salutem, non poenam ad damnationem. Sub medicamento positus ureris, secaris, clamas: non audit medicus ad voluntatem, sed audit ad sanitatem.

V. « Tu autem in sancto habitas, laus Israël<sup>2</sup>. » In illis habitas, quos sanctificasti, et quos facis intelligere, quia ad utilitatem quosdam non exaudis, et ad damnationem quosdam exaudis. Ad utilitatem non est exauditus Paulus, ad damnationem exauditus est diabolus. Petiit Job ad tentandum, et concessum est<sup>3</sup>. Dæmones petierunt se ire in porcos, et exaudiiti sunt<sup>4</sup>. Dæmones exaudiuntur, Apostolus non exauditur: sed illi exaudiuntur ad damnationem, Apostolus non exauditur ad salutem: « Quia non ad insipientiam mihi. Tu autem in sancto habitas, laus Israël. » Quare non exaudis et tuos? Quare dico ista? Mementote semper dici, Deo gratias: et magna est hic multitudo, et qui non solent venire, venerunt. Omnibus dico, quia in tribulatione positus Christianus probatur, si non dereliquit Deum suum. Nam quando bene est homini, desertus est sibi Christianus. Ignis intrat in fornacem, et fornax aurificis magni sacramenti res est. Ibi est aurum, ibi est palea, ibi ignis in angusto operatur. Ignis ille non est diversus, et diversa agit; paleam in cinereum vertit, auro sordes tollit. In quibus autem habitat Deus, utique in tribulatione meliores fiunt, tanquam au-

<sup>1</sup> 2 Cor. xii, 9. — <sup>2</sup> Psal. xxi, 4. — <sup>3</sup> Job. i, 11. — <sup>4</sup> Matth. viii, 31.

rum probati. Et si forte<sup>1</sup> petierit inimicus diabolus, et concessum illi fuerit : sive aliquo dolore corporis, sive aliquo damno, sive amissione suorum, fixum cor habeat in illo qui se non subtrahit, et si quasi subtrahit aurem ploranti, sed apponit misericordiam deprecanti. Novit quid agat qui nos fecit, novit et reficere nos. Bonus est structor qui ædificavit domum; et si aliquid ibi ceciderit, novit resarcire.

VI. Et vide quid dicat : « In te speraverunt patres nostri, » speraverunt, et eruisti eos<sup>2</sup>. » Et novimus, et legimus quam multos patres nostros sperantes in se eruit Deus. Eruit ipsum populum Israël de terra Ægypti<sup>3</sup>; eruit tres pueros de camino ignis; eruit Danielem de lacu leonum<sup>4</sup>; eruit Susannam de falso crimine<sup>5</sup>: omnes invocaverunt, et eruisti sunt<sup>6</sup>. Numquid defecit ad Filium suum, ut in cruce pendentem non exaudiret? Quare autem ipse non eruit modo, qui dixit, « In te speraverunt patres nostri, » et eruisti eos?

VII. « Ego autem sum vermis, et non homo<sup>7</sup>. Vermis, » et non homo; » nam est et homo vermis : sed ille, « Vermis, et non homo. » Unde non homo? Quia Deus. Quare ergo sic se abjecit ut diceret, « Vermis? » An quia vermis de carne sine concubitu nascitur, sicut Christus de Maria virgine? Et vermis? et tamen non homo. Quare vermis? Quia mortalis, quia de carne natus, quia sine concubitu natus. Quare non homo? Quia in principio erat Verbum, et Verbum erat apud Deum, et Deus erat Verbum<sup>8</sup>.

VIII. « Opprobrium hominum et abjectio plebis<sup>9</sup>. » Videte quanta passus est. Jam ut dicamus passionem, et ad illam majori gemitu veniamus, videte quanta modo

<sup>1</sup> Subauditur: quempiam probandum. — <sup>2</sup> Psal. xxi, 5. — <sup>3</sup> Exod. xii, 51. — <sup>4</sup> Dan. iii. — <sup>5</sup> Id. xiv. — <sup>6</sup> Id. xii. — <sup>7</sup> Psal. xxi, 7. — <sup>8</sup> Joan. 1, 1. — <sup>9</sup> Psal. xxi, 7.

patitur, et deinde videte quare. Quis enim fructus? Ecce speraverunt patres nostri, et eruti sunt de terra Ægypti. Et sicut dixi, tam multi invocaverunt, et statim ad tempus, non in futura vita, sed continuo liberati sunt. Ipse Job diabolo petenti concessus est, putrescens vermibus<sup>1</sup>: tamen in hac vita recuperavit salutem, duplo accepit quæ perdiderat<sup>2</sup>: Dominus autem flagellabatur, et nemo subveniebat; sputis deturpabatur, et nemo subveniebat; colaphis caedebatur, et nemo subveniebat; spinis coronabatur, et nemo subveniebat; levabatur in ligno, nemo eruit; clamat: « Deus meus, Deus meus, ut quid me dereliquisti<sup>3</sup>? » non subvenitur. Quare, fratres mei? Quare? Qua mercede tanta passus est? Omnia ista quæ passus est, pretium est. Cujus rei pretio tanta passus est, recitemus, videamus quæ dicat. Primum quæramus quæ passus sit, deinde quare: et videamus quam sint hostes Christi, qui confitentur, quia tanta passus est, et tollunt quare. Hinc audiamus totum in isto Psalmo, et quæ passus sit, et quare. Tenete ista duo, quid et quare. Modo ipsum quid explicem. Non ibi immoremur, et melius ad vos pervenient ipsa verba Psalmi. Videite quæ patitur Dominus, attendite Christiani: « Opprobrium hominum et abjectio plebis. »

IX. « Omnes qui videbant me, subsannabant me, locuti sunt labiis et moverunt caput. Speravit in Dominum, eruat eum, salvum faciat eum, quoniam vult eum<sup>4</sup>. » Sed quare dicebant ista? Quia homo factus erat, dicebant tanquam in hominem.

X. « Quoniam tu es qui extraxisti me de ventre<sup>5</sup>. » Numquid dicerent talia in illud quod in principio erat Verbum, et Verbum erat apud Deum? Verbum enim illud per quod facta sunt omnia, non extractum est de ventre, nisi quia

<sup>1</sup> Job. 1, 11. — <sup>2</sup> Id. xlvi, 10. — <sup>3</sup> Matth. xxvii, 46. — <sup>4</sup> Psal. xxi, 8, 9. — <sup>5</sup> Ibid. 10.